

Isrāīlī Qaum Registān Meñ



isrāīlī qaum registān meñ
The Israelites in the Desert

(Urdu—Roman script)

© 2022 Chashma Media.
published and printed by
Good Word Communication Services Pvt. Ltd.
New Delhi, INDIA

Bible text is from UGV.
illus.: R. Gunther (www.lambsongs.co.nz), S. Bentley
(www.freebibleimages.org)

for enquiries or to request more copies:
askandanswer786@gmail.com

Isrāīliyon ne apne ẖhudā se kitne mojize dekhe the. Bār bār ẖhudā ne un se wādā kiyā thā ki wuh unheñ Misr kī ġhulāmī se chhuṛāegā. Ab us kā wādā pūrā ho chukā thā. Āie ham paṛheñ ki Tauret Sharīf meñ kyā likhā hai:




Misr se Nikalne kā Rāstā

Phir Mūsā ne logon se kahā, “Is din ko yād rakho jab tum Rab kī azīm qudrat ke bāis Misr kī ġhulāmī se nikle.”

Jab Firaun ne Isrāīlī qaum ko jāne diyā to Allāh unheñ Filistiyon ke ilāqe meñ se guzarne wāle rāste se lekar na gayā, agarche us par chalte hue wuh jald hī Mulk-e-Kanān pahunch jāte. Balki Rab

ne kahā, “Agar us rāste par chaleṅge to unheñ dūsroñ se laṇā paṛegā. Aisā na ho ki wuh is wajah se apnā irādā badalkar Misr lauṭ jāeñ.” Is lie Allāh unheñ dūsre rāste se lekar gayā, aur wuh registān ke rāste se Bahr-e-Qulzum kī taraf baṛhe. Misr se nikalte waqt mard musallah the.



Rab un ke āge āge chaltā gayā, din ke waqt bādal ke satūn meñ tāki unheñ rāste kā patā lage aur rāt ke waqt āg ke satūn meñ tāki unheñ raushnī mile. Yoñ wuh din aur rāt safr kar sakte the. Din ke waqt

bādal kā satūn aur rāt ke waqt āg kā satūn un ke sāmne rahā. Wuh kabhī bhī apnī jagah se na haṭā.



Tab Rab ne Mūsā se kahā, “Isrāīliyon ko kah denā ki wuh pīchhe muṛkar Mijdāl aur samundar ke bīch yānī Fī-haḥīrot ke nazdīk ruk jāēn. Wuh Bāl-safon ke muqābil sāhil par apne ḡhaime lagāēn. Yīh dekhkar Firaun samajhegā ki Isrāīlī rāstā bhūlkar āwārā phir rahe haiñ aur ki registān ne chāron taraf unheñ gher rakhā hai. [...] Lekin main Firaun aur us kī pūrī fauj par apnā jalāl zāhir karūngā. Misrī jān leñge ki main hī Rab hūn.”

Isrāīliyon ne aisā hī kiya.

Jab Misr ke bādshāh ko ittalā dī gaī ki Isrāīlī hijrat kar gae haiñ to us ne aur us ke darbāriyon ne apnā ḡhyāl badalkar kahā, “Ham ne kyā kiya

hai? Ham ne unheñ jāne diyā hai, aur ab ham un kī k̄hidmat se mahrūm ho gae haiñ.” Chunāñche bādshāh ne apnā jangī rath taiyār karwāyā aur apnī fauj ko lekar niklā. Wuh 600 behtarīn qism ke rath aur Misr ke bāqī tamām rathoñ ko sāth le gayā. Tamām rathoñ par afsarān muqarrar the.



Jab Isrāīliyoñ ne Firaun aur us kī fauj ko apnī taraf baḥte dekhā to wuh saḡht ghabrā gae aur madad ke lie Rab ke sāmne chīk̄hne-chillāne lage. Unhoñ ne Mūsā se kahā, “Kyā Misr meñ qabroñ kī kamī thī ki āp hameñ registān meñ le āe haiñ? Hameñ Misr se nikālkar āp ne hamāre sāth kyā kiyā hai? Kyā ham ne Misr meñ āp se darḡhāst nahīñ kī thī ki mehrbānī karke hameñ chhoṛ deñ, hameñ Misriyoñ kī k̄hidmat karne deñ? Yahāñ

ākar registān men mar jāne kī nisbat behtar hotā ki ham Misriyon ke ġhulām rahte.”

Lekin Mūsā ne jawāb diyā, “Mat ghabrāo. Ārām se kharē raho aur dekho ki Rab tumhen āj kis tarah bachāegā. Rab tumhāre lie laṛegā. Tumhen bas, chup rahnā hai.”



Phir Rab ne Mūsā se kahā, “Tū mere sāmne kyon chīkh rahā hai? Isrāīliyon ko āge barhne kā hukm de. Apnī lāṭhī ko pakaṛkar use samundar ke ūpar uṭhā to wuh do hisson men baṭ jāegā. Isrāīlī khushk zamīn par samundar men se guzareṅge.

Allāh kā farishtā Isrāīlī lashkar ke āge āge chal rahā thā. Ab wuh wahān se haṭkar un ke pīchhe kharā ho gayā. Bādāl kā satūn bhī logon ke āge se haṭkar un ke pīchhe jā kharā huā. Is tarah bādāl

Misriyon aur Isrāīliyon ke lashkaron ke darmiyān ā gayā. Pūrī rāt Misriyon kī taraf andherā hī andherā thā jabki Isrāīliyon kī taraf raushnī thī. Is lie Misrī pūrī rāt ke daurān Isrāīliyon ke qarīb na ā sake.

Mūsā ne apnā hāth samundar ke ūpar uṭhāyā to Rab ne mashriq se tez āndhī chalāī. Āndhī tamām rāt chaltī rahī.



Us ne samundar ko pīchhe haṭākar us kī tah ḡhushk kar dī. Samundar do hisson meñ baṭ gayā to Isrāīlī samundar meñ se ḡhushk zamīn par chalte hue guzar gae. Un ke dāīn aur bāīn taraf pānī dīwār kī tarah khaṛā rahā.

Jab Misriyon ko patā chalā to Firaun ke tamām ghore, rath aur ghurṣawār bhī un ke pīchhe pīchhe



samundar mein chale gae. Subh-sawere hī Rab ne bādāl aur āg ke satūn se Misr kī fauj par nigāh kī aur us mein abtarī paidā kar dī. Un ke rathoñ ke pahiye nikal gae to un par qābū pānā mushkil ho gayā. Misriyoñ ne kahā, “Āo, ham Isrāīliyoñ se bhāg jāeñ, kyonki Rab un ke sāth hai. Wuhī Misr kā muqābalā kar rahā hai.”


Tab Rab ne Mūsā se kahā, “Apnā hāth samundar ke ūpar uṭhā. Phir pānī wāpas ākar Misriyoñ, un ke rathoñ aur ghurṣawāroñ ko ḍubo degā.”

Mūsā ne apnā hāth samundar ke ūpar uṭhāyā to din nikalte waqt pānī māmūl ke mutābiq bahne lagā, aur jis taraf Misrī bhāg rahe the wahāñ pānī hī pānī thā. Yoñ Rab ne unheñ samundar mein bahākar gharq kar diyā. Pānī wāpas ā gayā. Us ne



rathon aur ghursawaron ko dhānk liyā. Firaun kī pūrī fauj jo Isrāīliyon kā tāqqub kar rahī thī ḍūbkar tabāh ho gaī. Un meñ se ek bhī na bachā.

Lekin Isrāīlī khushk zamīn par samundar meñ se guzare. Un ke dāīn aur bāīn taraf pānī dīwār kī tarah kharā rahā.



Us din Rab ne Isrāīliyon ko Misriyon se bachāyā.
[...] Jab Isrāīliyon ne Rab kī yih azīm qudrat dekhī
jo us ne Misriyon par zāhir kī thī to Rab kā khauf
un par chhā gayā. Wuh us par aur us ke khādim
Mūsā par etamād karne lage.

Mūsā kā Gīt

Tab Mūsā aur Isrāīliyon ne Rab ke lie yih gīt gāyā,

“Main Rab kī tamjīd meñ gīt gāūngā,
Kyonki wuh nihāyat azīm hai.
Rab merī quwwat aur merā gīt hai,
Wuh merī najāt ban gayā hai.
Wuhī merā Ḳhudā hai,
aur main us kī tārif karūngā.
Wuhī mere bāp kā Ḳhudā hai,
aur main us kī tāzīm karūngā.
Ai Rab, kaun-sā mābūd terī mānind hai?
Kaun terī tarah jalālī aur quddūs hai?
Kaun terī tarah hairatangez kām kartā
aur azīm mojize dikhātā hai?
Koī bhī nahīn.
Apnī shafqat se tū ne ewazānā dekar
apnī qaum ko chhuṭkāṛā diyā
aur us kī rāhnumāī kī hai,
Apnī qudrat se tū ne use
apnī muqaddas sukūnatgāh tak
pahuñchāyā hai.
Rab abad tak bādshāh hai!”



Tab Hārūn kī bahn Mariyam jo nabiya thī ne daf liyā, aur bāqī tamām aurateñ bhī daf lekar us ke pīchhe ho līñ. Sab gāne aur nāchne lagīñ.

Mariyam ne yih gākar un kī rāhnumāī kī, “Rab kī tamjīd meñ gīt gāo, kyonki wuh nihāyat azīm hai. ”

Sawāl

- *Isrāīliyon ne bār bār Ḳhudā ke azīm kām dekhe the. Ab jab wuh Misr se nikalne lage to kyā Allāh ne apnī qaum ko chhor diyā?*
 - ▶ Hargiz nahīn! Ḳhudā qadam baqadam un ke sāth chaltā rahā.
- *Us ne kis tarah un kī rāhnumāī kī?*
 - ▶ Wuh Ḳhud un ke darmiyān rahā. Din ke waqt bādāl ke satūn mein aur rāt ke waqt āg ke satūn mein. Sāth sāth Allāh Hazrat Mūsā ko farmātā rahā ki unhein kyā karnā hai aur kis tarah qaum kī rāhnumāī karnī hai. Bilkul usī tarah jis tarah ek zabūr mein likhā hai,

Us ne apnī rāheñ Mūsā par aur apne azīm kām Isrāīliyon par zāhir kie.
(Zabūr 103:7)

- *Kyā ham bhī Ḳhudā kī rāhnumāī kā tajribā kar sakte hain?*
 - ▶ Zarūr, jab ham us kī qaum mein shāmil ho jāte hain. Ḳhudā qaum se kahīn dūr nahīn rahtā balki wuh apnī qaum ke darmiyān hī maujūd rahtā hai. Allāh beparwā nahīn hai. Use fikr hai ki Isrāīlī kis rāh par chal rahe hain. Bilkul isī tarah use baṛī fikr hai ki ham

kis rāh par chalte haiñ. Wuh hamen achchhī rāh par lānā chāhtā hai. Yoñ Zabūr men wuh wādā kartā hai,

Maiñ tujhe tālīm dūngā, tujhe wuh rāh dikhāūngā jis par tujhe jānā hai. Maiñ tujhe mashwarā dekar terī dekh-bhāl karūngā. (Zabūr 32:8)

Is lie ham Hazrat Dāūd ke sāth duā kar sakte haiñ,

Apnī sachchāī ke mutābiq merī rāhnumāī kar, mujhe tālīm de. Kyoñki tū merī najāt kā Ḳhudā hai. (Zabūr 25:4-5)

- *Lekin lagtā hai ki Ḳhudā se ġhalatī huī hai, ki wuh Isrāīlī qaum ko ġhalat rāh par lāyā hai. Kyoñki chalte chalte un ko patā chaltā hai ki un ke sāmne samundar hai jabki dushman un kā pīchhā kar rahā hai. Misrī fauj pahuñchne wāle haiñ, aur koī sahārā nahīñ. Bachne kā rāstā kahīñ dikhāī nahīñ detā. Isrāīliyoñ kī maut yaqīnī lagtī hai. Agar hamāre sāth aisā hotā to ham kyā karte? Kyā ham mutma'in rahte yā pareshān ho jāte?*
 - Beshak ham ḍar ke māre pighalne lagte.

- *Isrāīliyon ne kyā mahsūs kiyā?*
 - Wuh bhī saḡht ḍar gae.
- *Yih ḡhatrā dekhkar unhoṅ ne kyā kiyā?*
 - Wuh gāliyān kasne lage. Hazrat Mūsā ko burā-bhalā kahne lage. Kahne lage ki tū ne hamen is phande men kyon phansāyā?
- *Hazrat Mūsā ne jawāb men kyā kiyā?*
 - Is kā sirf ek sahī jawāb thā aur wuh thā Ḳhudā se iltijā.
- *Kyon?*
 - Allāh ne to wādā kiyā thā ki wuh Isrāīlī qaum ko Misr ke zulm-o-sitm se bachāegā. Beshak Hazrat Mūsā ko bhī saḡht ḍar aur pareshānī thī. Magar unhoṅ ne apnī pareshānī apne Ḳhudā ke sāmne rakhkar qaum kī hauslā-afzāi kī ki wuh Ḳhudā par bharosā rakhe,

“Mat ghabrāo. Ārām se khare raho aur dekho ki Rab tumhen āj kis tarah bachāegā. Rab tumhare lie laṛegā. Tumhen bas, chup rahnā hai.” (Ḳhurūj 15:13-14)

Tab ẖhudā ne najāt kā apnā mansūbā un par zāhir karke unheñ samundar meñ se guzarne diyā.

- *Qaum ne kyā jawāb diyā?*

- Log najāt ke is mansūbe par etamād karke samundar meñ se guzar gae. Unhoñ ne Allāh ke kalām par bharosā kiyā. Un kā imān puḡhtā thā ki ham samundar kī tah par chalte chalte dūsre sāhil tak pahuncheñge. Yoñ likhā hai,

Yih imān kā kām thā ki Isrāīlī Bahr-e-Qulzum meñ se yoñ guzar sake jaise ki yih ḡhushk zamīn thī. Jab Misriyoñ ne yih karne kī koshish kī to wuh dūb gae. (Ibrāniyoñ 11:29)

Hazrat Dāūd bhī ek zabūr meñ farmāte haiñ,

Tujh par hamāre bāpdādā ne bharosā rakhā, aur jab bharosā rakhā to tū ne unheñ rihāī dī. Jab unhoñ ne madad ke lie tujhe pukārā to bachne kā rāstā khul gayā. Jab unhoñ ne tujh par etamād kiyā to sharmindā na hue. (Zabūr 22:4-5)

Qaum ko Kḥudā par bharosā hai, aur is binā par wuh apnī qaum ko bachātā hai. Us kā yih mojizā Zabūr meñ bhī bayān kiyā gayā hai,

To bhī us ne unheñ apne nām kī kḥātir bachāyā, kyonki wuh apnī qudrat kā izhār karnā chāhtā thā. Us ne Bahr-e-Qulzum ko jhirkā to wuh kḥushk ho gayā. Us ne unheñ samundar kī gahrāiyon meñ se yon guzarne diyā jis tarah registān meñ se. Us ne unheñ nafrat karne wāle ke hāth se chhuṛāyā aur ewazānā dekar dushman ke hāth se rihā kiyā.
(Zabūr 106:8-10)

Āie, ham bhī Allāh ke huzūr āeñ jab ham pareshāniyon se ghire rahte haiñ. Jab kabhī Hazrat Dāūd ko ḍar lagtā to wuh Kḥudā ke huzūr ākar iltijā kartā aur natīje meñ madad miltī thī.

Lekin jab k̥hauf mujhe apnī girift
meñ le le to main tujh par hī
bharosā rakhtā hūñ. Allāh ke kalām
par merā faḡhr hai, Allāh par merā
bharosā hai. Main ḍarūngā nahīñ,
kyoñki fānī insān mujhe kyā nuqsān
pahunchā saktā hai? (Zabūr 56:3-4)

Yasāyāh Nabī bhī is par zor detā hai ki ham na
ḍareñ balki pareshānī ke waqt K̥hudā kī taraf
rujū lāeñ, usī ko takte raheñ.

Dharakte hue dilon se kaho,
“Hauslā rakho, mat ḍaro. Dekho,
tumhārā K̥hudā [...] tumheñ
bachāne ke lie ā rahā hai.”
(Yasāyāh 35:4)

Hazrat Īsā ko bhī mālūm hai ki ham jo insān
haiñ hameshā pareshān rahte haiñ. Is lie
wuh farmāte haiñ,

Tumhārā dil na ghabrāe. Tum Allāh
par imān rakhte ho, mujh par bhī
imān rakho. (Yūhannā 14:1)

Ek bār jab Paulus rasūl ko marne kā k̥hatrā
thā to unhoñ ne bād meñ likhā,

Ham ne mahsūs kiyā ki hamen̄ sazā-e-maut dī gaī hai. Lekin yih is lie huā tāki ham apne āp par bharosā na karen̄ balki Allāh par jo murdoñ ko zindā kar detā hai. Usī ne hamen̄ aisī haibatnāk maut se bachāyā aur wuh āindā bhī hamen̄ bachāegā. Aur ham ne us par ummīd rakhī hai ki wuh hamen̄ ek bār phir bachāegā.

(2 Kurinthyoñ 1:9-10)

Āj bhī Ḳhudā chāhtā hai ki ham us par pūrā bharosā rakheñ. Na wuh is se zyādā māngtā hai na kam.

Lekin main̄ terī shafqat par bharosā rakhtā hūñ, merā dil terī najāt dekhkar ḡhushī manāegā. main̄ Rab kī tamjīd meñ gīt gāūngā, kyon̄ki us ne mujh par ehsān kiyā hai. (Zabūr 13:5-6)

Najāt pāne par Isrāīlī qaum ne Allāh kā shukr karke us kī tamjīd kī. Hazrat Mūsā ne us kī tārīf meñ ek gīt bhī likhā.

Hazrat Dāūd apne zabūroñ meñ bhī bār bār apne Ḳhudā kī hamd-o-sanā kartā hai.

Rab kī tamjīd ho,
kyonki us ne merī iltijā sun lī.
Rab merī quwwat aur merī ḍhāl hai.
Us par mere dil ne bharosā rakhā,
us se mujhe madad milī hai.
Merā dil shādiyānā bajātā hai,
main gīt gākar us kī satāish kartā
hūn. (Zabūr 28:6-7)

- *Kyā Isrāīlī yih tamām azīm kām dekhkar ab se Ḳhudā par bharosā rakhte aur us kī satāish karte rahe?*
 - Āie ham dekhte hain ki is ke bād kyā huā.



Man aur Baṭeren

Is ke bād Isrāīl kī pūrī jamāt Elīm se safr karke Sīn ke registān mein pahuñchī [...]. Registān mein tamām log phir Mūsā aur Hārūn ke k̥hilāf buṛbuṛāne lage. Unhoñ ne kahā, “Kāsh Rab hamen Misr mein hī mār ḍāltā! Wahān ham kam-az-kam jī bharkar gosht aur roṭī to khā sakte the. Āp hamen sirf is lie registān mein le āe haiñ ki ham sab bhūke mar jāen.”

Tab Rab ne Mūsā se kahā, “Main āsmān se tumhāre lie roṭī barsāūngā. Har roz log bāhar jākar usī din kī zarūrat ke mutābiq khānā jamā karen. Is se main unhen āzmākar dekhūngā ki āyā wuh merī sunte haiñ ki nahīn. Har roz wuh sirf utnā khānā jamā karen jitnā ki ek din ke lie kāfī ho.



Lekin chhaṭe din jab wuh khānā taiyār kareṅge to wuh agle din ke lie bhī kāfī hogā.”

Mūsā aur Hārūn ne Isrāīliyon se kahā, “Āj shām ko tum jān loge ki Rab hī tumheñ Misr se nikāl lāyā hai. Aur kal subh tum Rab kā jalāl dekhoge. Us ne tumhārī shikāyateñ sun lī haiñ, kyonki asl meñ tum hamāre ḳhilāf nahīn balki Rab ke ḳhilāf buṛbuṛā rahe ho. Phir bhī Rab tum ko shām ke waqt gosht aur subh ke waqt wāfir roṭī degā, kyonki us ne tumhārī shikāyateñ sun lī haiñ. Tumhārī shikāyateñ hamāre ḳhilāf nahīn balki Rab ke ḳhilāf haiñ.”

Mūsā ne Hārūn se kahā, “Isrāīliyon ko batānā, ‘Rab ke sāmne hāzir ho jāo, kyonki us ne tumhārī shikāyateñ sun lī haiñ.’”



Jab Hārūn pūrī jamāt ke sāmne bāt karne lagā to logoñ ne palaṭkar registān kī taraf dekhā. Wahāñ Rab kā jalāl bādāl meñ zāhir huā. Rab ne Mūsā se kahā, “Main ne Isrāīliyoñ kī shikāyat sun lī hai. Unheñ batā, ‘Āj jab sūraj ghurūb hone lagegā to tum gosht khāoge aur kal subh peṭ bharkar roṭī. Phir tum jān loge ki main Rab tumhārā Ḳhudā hūñ’.”

Usī shām baṭeroñ ke ghol āe jo pūrī khaimāgāh par chhā gae. Aur aglī subh khaime ke chāroñ taraf os paṛī thī. Jab os sūkh gai to barf ke gāloñ jaise patle dāne pāle kī tarah zamīn par paṛe the. Jab Isrāīliyoñ ne use dekhā to ek dūsre se pūchhne lage, “Man hū?” Yāñi “Yih kyā hai?” Kyonki wuh nahīñ jānte the ki yih kyā chīz hai.



Mūsā ne un ko samjhāyā, “Yih wuh roṭī hai jo Rab ne tumheñ khāne ke lie dī hai. Rab kā hukm hai ki har ek utnā jamā kare jitnā us ke ḵhāndān ko zarūrat ho. Apne ḵhāndān ke har fard ke lie do liter jamā karo.”

Isrāīliyon ne aisā hī kiyā. Bāz ne zyādā aur bāz ne kam jamā kiyā. Lekin jab use nāpā gayā to har ek ādmī ke lie kāfī thā. Jis ne zyādā jamā kiyā thā



us ke pās kuchh na bachā. Lekin jis ne kam jamā kiyā thā us ke pās bhī kāfī thā.

Isrāīliyon ne is khurāk kā nām ‘man’ rakhā. Us ke dāne dhaniye kī mānind safed the, aur us kā zāyqā shahd se bane cake kī mānind thā.

Chaṭān se Pānī

Phir Isrāīl kī pūrī jamāt Sīn ke registān se niklī. Rab jis tarah hukm detā rahā wuh ek jagah se dūsri jagah safr karte rahe. Rafīdīm mein unhoñ ne khaima lagāe.

Wahāñ pīne ke lie pānī na milā. Is lie wuh Mūsā ke sāth yih kahkar jhagaṛne lage, “Hameñ pīne ke lie pānī do.”



Mūsā ne jawāb diyā, “Tum mujh se kyon jhagar rahe ho? Rab ko kyon āzmā rahe ho?”

Lekin log bahut pyāse the. Wuh Mūsā ke khilāf burburāne se bāz na āe balki kahā, “Āp hamen Misr se kyon lāe hain? Kyā is lie ki ham apne bachchon aur rewaron samet pyāse mar jāen?”

Tab Mūsā ne Rab ke huzūr fariyād kī, “Main in logon ke sāth kyā karūn? Hālāt zarā bhī aur bigar jāen to wuh mujhe sangsār kar denge.”

Rab ne Mūsā se kahā, “Kuchh buzurg sāth lekar logon ke āge āge chal. Wuh lāṭhī bhī sāth le jā jis se tū ne Dariyā-e-Nīl ko mārā thā. Main Horib yānī Sīnā Pahār kī ek chaṭān par tere sāmne kharā hūngā. Lāṭhī se chaṭān ko mārṇā to us se pānī niklegā aur log pī sakeṅge.”





Mūsā ne Isrāīl ke buzurgoñ ke sāmne aisā hī kiyā. Us ne us jagah kā nām ‘Massā aur Marībā’ yānī ‘Āzmānā aur Jhagaṛnā’ rakhā, kyonki wahān Isrāīlī buṛbuṛāe aur yih pūchhkar Rab ko āzmāyā ki kyā Rab hamāre darmiyān hai ki nahīn?

Sawāl

- *Kyā Isrāīlī hameshā Ḳhudā par bharosā rakhte rahe? Kyā wuh har waqt Ḳhudā kī taraf dekhte rahe?*

► Hargiz nahīn. Jyon hī unheñ kisī musībat kā sāmna karnā parṭā to unheñ Allāh kī madad aur azīm kām yād na rahte. Wuh apnī pareshāniyāñ Ḳhudā ko pesh karke us kī madad māngnā bhūl jāte the.

- *Is ke baraks wuh kyā karte the?*

► Jab bhī unheñ diqqat mahsūs hotī to wuh shikāyat karte aur Hazrat Mūsā se nārāz hokar un par ilzām lagāte. Unheñ yād na rahtā ki unheñ Ḳhudā par bharosā rakhnā aur us se iltijā karnā chāhie. Hazrat Mūsā ne farmāyā ki tum mujh se nahīn balki Allāh se shikāyat kar rahe ho.

Ham Zabūr meñ bhī yih kuchh parṭe haiñ, ki Ḳhudā kī qaum kitnī bewafā rahī aur ki Ḳhudā is ke bāwujūd kitnā wafādār rahā. Us ne bār bār Hazrat Mūsā kī sunī jab use buṛbuṛātī qaum kī sifārish karnī parī.

Mulk-e-Misr ke ilāqe Zuan mein us ne un ke bāpdādā ke dekhte dekhte mojize kie the. Samundar ko chīrkar us ne unhein us mein se guzarne diyā, aur donoñ taraf pānī mazbūt dīwār kī tarah kharā rahā. Dīn ko us ne bādāl ke zariye aur rāt-bhar chamakdār āg se un kī qiyādat kī. Registān mein us ne pattharon ko chāk karke unhein samundar kī-sī kasrat kā pānī pilāyā. [...] Lekin wuh us kā gunāh karne se bāz na āe balki registān mein Allāh Ta’ālā se sarkash rahe.

(Zabūr 78:12-15,17)

Jab hamāre bāpdādā Misr mein the to unhein tere mojizon kī samajh na āī aur terī muta’addad mehrbānīyān yād na rahīn balki wuh samundar yānī Bahr-e-Qulzum par sarkash hue. To bhī us ne unhein apne nām kī khātir bachāyā, kyonki wuh apnī qudrat kā izhār karnā chāhtā thā. [...] Tab unhoñ ne Allāh ke farmānon par imān lākar us kī madahsarāī kī. Lekin jald hī wuh

us ke kām bhūl gae. Wuh us kī marzī kā intazār karne ke lie taiyār na the. Registān meñ shadīd lālch meñ ākar unhoñ ne wahīñ bayābān meñ Allāh ko āzmāyā. Tab us ne un kī darḡhāst pūrī kī.
(Zabūr 106:7-8,12-15)

Mālīkoñ ke mālīk kā shukr karo, kyoñki us kī shafqat abadī hai. Jo akelā hī azīm mojīze kartā hai us kā shukr karo, kyoñki us kī shafqat abadī hai. [...] Āsmān ke Ḳhudā kā shukr karo, kyoñki us kī shafqat abadī hai. (Zabūr 136:3-4,26)

Ḳhudā ne apnī qaum ko Misr kī ḡhulāmī se nikālkar chhurāyā. Wuh apnī qaum se muhabbat rakhtā, us kī madad kartā aur use sab kuchh muhaiyā kartā hai. Wuh us se rifāqat rakhnā chāhtā hai. Tāham Isrāīlī apne Ḳhudā ko bhūlkar gunāh karte the. Wuh yoñ gunāh karte the jis tarah tamām insān Hazrat Ādam aur Hawwā se lekar āj tak karte āe haiñ.

Ḳhudā chāhtā hai ki ham us par bharosā rakheñ, taslīm kareñ ki wuh hamārā Ḳhudā aur hamārā najāt dene wālā hai. Wuh yih bhī chāhtā hai ki ham ek dūsre ke sāth na jhagareñ balki sulah-salāmatī kī zindagī guzāreñ. Is lie us ne Hazrat Ādam aur Hawwā kī aulād ko ahkām baḡhsh die tāki wuh un kī madad se us kī marzī ke mutābiq zindagī basar kar sakeñ. Is ke das markazī ahkām the. In meñ se kuchh dikhāte haiñ ki hamārā Allāh ke sāth sulūk kaisā honā chāhie. Dūsre zāhir karte haiñ ki hamārā ek dūsre ke sāth bartāw kaisā honā chāhie. Āie ham Tauret Sharīf ko paḡheñ.



Koh-e-Sīnā

Isrāīliyon ko Misr se safr karte hue do mahīne ho gae the. Tīsre mahīne ke pahle hī din wuh Sīnā ke registān meñ pahuñche. Wahāñ unhoñ ne registān meñ pahār ke qarīb ñere ñāle.

Tab Mūsā pahār par chaṛhkar Allāh ke pās gayā. Allāh ne pahār par se Mūsā ko pukārkar kahā, “Yāqūb ke gharāne banī Isrāīl ko batā, ‘Tum ne dekhā hai ki main ne Misriyon ke sāth kyā kuchh kiyā, aur ki main tum ko uqāb ke paron par uṭhākar yahāñ apne pās lāyā hūñ. Chunañche agar tum merī suno aur mere ahd ke mutābiq chalo to

phir tamām qaumon meñ se merī k̄hās milkiyat hoge. Go pūrī duniyā merī hī hai, lekin tum mere lie maḵsūs imāmon kī bādshāhī aur muqaddas qaum hoge.’ Ab jākar yih sārī bāteñ Isrāīliyon ko batā.”

Mūsā ne pahār se utarkar aur qaum ke buzurgon ko bulākar unheñ wuh tamām bāteñ batāñ jo kahne ke lie Rab ne use hukm diyā thā. Jawāb meñ pūrī qaum ne milkar kahā, “Ham Rab kī har bāt pūrī kareñge jo us ne farmāi hai.” Mūsā ne pahār par lauṭkar Rab ko qaum kā jawāb batāyā.

Jab wuh pahuñchā to Rab ne Mūsā se kahā, “Main ghane bādal meñ tere pās āūngā tāki log mujhe tujh se hamkalām hote hue suneñ. Phir wuh hameshā tujh par bharosā rakheñge.”



Tab Mūsā ne Rab ko wuh tamām bāteñ batāñ jo logon ne kī thiñ. Rab ne Mūsā se kahā, “Ab logon ke pās lauṭkar āj aur kal unheñ mere lie maḵsūs-o-muqaddas kar. Wuh apne libās dhokar tīsre din ke lie

taiyār ho jāeñ, kyonki us din Rab logon ke dekhte dekhte Koh-e-Sīnā par utaregā. Logon kī hifāzat

ke lie chāron taraf pahār kī haden muqarrar kar. Unhen khabardār kar ki hudūd ko pār na karo. Na pahār par chaṛho, na us ke dāman ko chhuo. Jo bhī use chhue wuh zarūr mārā jāe.



Tīsre din subh pahār par ghanā bādāl chhā gayā. Bijlī chamakne lagī, bādāl garajne lagā aur narsinge kī nihāyat zordār āwāz sunāī dī. Khaimāgāh men log laraz uṭhe. Tab Mūsā logoñ ko Allāh se milne ke lie khaimāgāh se bāhar pahār kī taraf le gayā, aur wuh pahār ke dāman men khare hue. Sīnā Pahār dhuen se dhakā huā thā, kyonki

Rab āg meñ us par utar āyā. Pahār se dhuāñ is tarah uṭh rahā thā jaise kisī bhaṭṭe se uṭhtā hai. Pūrā pahār shiddat se larazne lagā. Narsinge kī āwāz tez se teztar hotī gaī. Mūsā bolne lagā aur Allāh use ūñchī āwāz meñ jawāb detā rahā.

Log Ghabrā Jāte Haiñ

Jab bāqī tamām logoñ ne bādāl kī garaj aur narsinge kī āwāz sunī aur bijlī kī chamak aur pahār se uṭhte hue dhueñ ko dekhā to wuh kḥauf ke māre kāñpne lage aur pahār se dūr kḥaṛe ho gae. Unhoñ ne Mūsā se kahā, “Āp hī ham se bāt karen to ham suneñge. Lekin Allāh ko ham se bāt na karne deñ warnā ham mar jāeñge.”



Lekin Mūsā ne un se kahā, “Mat ḍaro, kyoñki Rab tumheñ jāñchne ke lie āyā hai, tāki us kā kḥauf tumhārī āñkhoñ ke sāmne rahe aur tum gunāh na karo.” Log dūr hī rahe jabki Mūsā us gahrī tārīkī ke qarīb gayā jahāñ Allāh thā.

Das Ahkām

Tab Allāh ne yih tamām bāteñ farmāñ,

- “Main Rab terā ẖhudā hūñ jo tujhe Mulk-e-Misr kī ḡhulāmī se nikāl lāyā. Mere siwā kisī aur mābūd kī parastish na karnā.
- Apne lie but na banānā. Kisī bhī chīz kī mūrāt na banānā, chāhe wuh āsmān meñ, zamīn par yā samundar meñ ho. Na butoñ kī parastish, na un kī ẖhidmat karnā, kyonki main terā Rab ḡhayūr ẖhudā hūñ. Jo mujh se nafrat karte haiñ unheñ main tīsri aur chauthi pusht tak sazā dūngā. Lekin jo mujh se muhabbat rakhte aur mere ahkām pūre karte haiñ un par main hazār pushtoñ tak mehrbānī karūngā.
- Rab apne ẖhudā kā nām bemaqsad yā ḡhalat maqsad ke lie istemāl na karnā. Jo bhī aisā kartā hai use Rab sazā die baḡhair nahīn chhoregā.
- Sabat ke din kā ẖhyāl rakhnā. Use is tarah manānā ki wuh maḡhsūs-o-muqaddas ho. Hafte ke pahle chhih din apnā kām-kāj kar, lekin sātwañ din Rab tere ẖhudā kā ārām kā din hai. Us din kisī tarah kā kām na karnā. Na

tū, na terā beṭā, na terī beṭī, na terā naukar, na terī naukarānī aur na tere maweshī. Jo padesī tere darmiyān rahtā hai wuh bhī kām na kare. Kyonki Rab ne pahle chhih din mein āsmān-o-zamīn, samundar aur jo kuchh un mein hai banāyā lekin sātweh din ārām kiyā. Is lie Rab ne Sabat ke din ko barkat dekar muqarrar kiyā ki wuh maḥsūs aur muqaddas ho.

- Apne bāp aur apnī mān kī izzat karnā. Phir tū us mulk mein jo Rab terā Ḳhudā tujhe dene wālā hai der tak jītā rahegā.
- Qatl na karnā.
- Zinā na karnā.
- Chorī na karnā.
- Apne paṛosī ke bāre mein jhūṭhī gawāhī na denā.
- Apne paṛosī ke ghar kā lālch na karnā. Na us kī bīwī kā, na us ke naukar kā, na us kī naukarānī kā, na us ke bail aur na us ke gadhe kā balki us kī kisī bhī chīz kā lālch na karnā.”

Tab Rab ne Mūsā se kahā, “Isrāīliyon ko batā, “Tum ne ḳhud dekhā ki main ne āsmān par se tumhāre sāth bāteñ kī haiñ. Chunāñche merī parastish ke sāth sāth apne lie sone yā chāndī ke but na banāo. Mere lie miṭṭī kī qurbāngāh banākar

us par apnī bheṛ-bakriyon aur gāy-bailon kī bhasm
hone wālī aur salāmatī kī qurbāniyān chaṛhānā.
Main tujhe wuh jagheñ dikhāūngā jahān mere
nām kī tāzīm meñ qurbāniyān pesh karnī haiñ.
Aisī tamām jaghon par main tere pās ākar tujhe
barkat dūngā. [...] Jo bhī hidāyat main ne dī hai
us par aml kar.

Sawāl

Ab qaum ko ẖhudā kā tajribā huā thā, aur unheñ un ahkām kī samajh āī jo Allāh ne diyā thā.

- *Kyā wuh ab se in ahkām ke taht rahe?*
- *Kyā ab se Isrāīliyon ko ẖhudā aur us kī bāteñ yād rahīñ?*
- *Kyā wuh ab se gunāh karne se bāz rahe?*
- *Kyā wuh ab se yon zindagī guzārne lage ki ẖhudā un se rifāqat rakh sake?*
- *Āp kā kyā khyāl hai?*

Jo mazīd tafsīl se Hazrat Mūsā ke bāre meñ paṛhnā chāhtā hai wuh Tauret meñ ẖhurūj 13 se lekar 20 tak paṛhe.